

Zangsi siallum kan sang a pal bang nang a suktui lun le lam tui mang hong nem ta e, Siallum kawl tiang meel mang ta ka ti kom a do nen nuai a tong dam pat bang neaming e. (Sukte le Tiddim te in hong simpui nawn ngawl a, hong nusiati a phua hi. (Pu Khuplian la)

Sizang teng vaihnawm a, dotu hi ziam tumtu hi ziam, ti aa a kidok tiang, ih omoa tek panin dotu hi, tiin dui sungah ki tai hi. Limkhai Manglun te hi leh tum pai hi. Khawsak sangin Thuklai khua ten na tu aa nuam zaw a hi man, Thuklai khua zangpitam kiti na a, hong kikhin pheia, kimai na a paw pawl, bawlung satna, bawlung sui natur lei hong to hi.

A omna pohah, huan hong vawt a, au kam Kawbi hong ting hi. Khui zong hong khawi hi. Tuak panin Sizang upate hong tum ta vun tiin, hausa theampo hong khawm a. Hausa le upa te in ih na zak kibang ngawl a hi tiang, tum zaw ka heu tawng tiin, kumpi sangah ki tum hi.

Ngam sung vive a kiom a hi man. Thuklai, Khawsak, Buanman kim khat kitum ngawl lai hi. Tuahnuam tuu, taap teng a vekpin tum ngawl hi.

"History is but a recalling of this wonderful creature's doings, his struggles, achievements and failures in the past that they might instruct his present, and bear fruit in future—

Sharma.

Siallum Kido Na Thu

Mangkangte khuasak a thet ni-in Buanman a, Sizaang, Tiddim, Sukte tul nih bang kikhawm hi. Tuak sungah Khaw Chin zong hong kihel hi. Tu-in kumpite do tu hi ziam. Tum zawtu hi ziam, ti a, a kikap lai takin Kumpite in Khawsak pan top tawh hong kap, a Thautang hong nging kik dawm ngawlin, Lopa, thingkung hong kuang siat pai hi.

Tua Thautang puak tham kitak huai a, lamdang kisa a hi manin, Tiddim mi le Khaw Chin te pawlio hong tai san hi. Tua a hi komin Thuklai, Buanman, Khawsak dui sungah kitai siat hi. Limkhai Manglun a hi leh Kumpite kung zuan pai a, kipawl pai hi.

Tuahnuam tuu Taapte pawlin "Kumpite do tu hi" tiin Vaihawm in Siallum ah kul to hi. Siallum-ah kulh 3 kito hi. Khiapthuam tuu le Thatkhup tuu tein, "Kumte ih dotu sia, um nawn ba ve hing, Sisang buppi aa in do a, ih nan lak sa abi tiang, tum zaw ye tawng, ti hi.

Tapte pawlin Kumpite in hong uk le, Voklak ngam Limkhaite tawh ih kitu sia, tan kik leleu tu ih hi tiang, Kumpite ma do zaw tu hi. Nong do pui nuam hua a, a hi leh Kumpite ka zo ub le, Voklak ngam sia lo tiag khat zo ng nga thei ngawl tu nu hi, ti hi.

Khiapthuam tuu le Thatkhup tuu tein, a hi le, Kumpite hong dopui ngawl to khu hi, tiin Dubmang—Takkhawlak teang a, Siallum kulh pan hong dopui ngawl hi. A hi zong Thatkhup tuu le Khiapthuam tuu, Tunzam pa Orntun in hong dopui hi. Orntun sia, ngal vil vive le ngal en ku vive in kikawi hi. Kulh hawng sia, puanbuu tawh kikhak a, Puan bu hawng pan Orntun in en sak tawntung hi. A dang pan a sawl tak Hongsuak le Sumson te in hong kah pui hi. Thatkhup tuu pan Zavum, Zongtuang, Euthuam, Lamkhup in hong do pui hi. Siallum kulh sia kulh 3 in kivawt a, a uktu mihing 3 kikawi hi. Liankam, Vummang Kamtin in kiuk sak hi. Dolian in nupi kulh uk hi.

(a). Ngamzang daw tam ka ngai man a, lei do pal bang nang ing e.

Phung luang huan thing zan kisia e, sang lun a zawi kik ing e.

Manglun in Kumpite mun a pai a, Siallumah kulh to hi, tiin son hi. (The Chin Hills Vol. 1. Page 134). - Kumpite in, "Mi nam dang sua pui u le nauté awng, kilem tu hi, hong pai ta vun, kote sia na ngam hong sesak tu hi ngawl khu hi. Kilemna vawt tu a hong pai sak, ngam vil aa hong sawl te hi bek khu hi" tiin kam hong tai sak hi.

Siallum panin kam kivai tha kik a, "Kote hong tum ngawltu khu hi," ti hi. Tasia tiang Kumpi te in hong tum ngawl takpi tu na hi ub le tua ni tua tha a, hong kap tu a, hong paitu khu hi. Na kinging khol vun tiin thū hong piā leleu hi.

Siallum pan Kumpite munah kam kipuak kik a, "Pha hi, hong pai ma memeng ta vun, thi san nai san hong suah nuam memeng khu hi," ti hi. Kumpite ih a kamphen hong ken pa sia Kio Thuai hi. Kio Thuai sia kawl mi hi. Nawikai kbua teang hi. A masia limkhai Tuangkham inn teang pa hi. Tua huh in Sizang kam a tel thiangtho in kamphen thei hi.

Ih pu ih pa tepteh na panin Siallum simtu in, ngalkap 380, hong kuan hi. A Kamphen pa Kio Thuai in Siallum lam ap pui za zan a, zing sang vak bek a, Thuklai pan hong kuan sia, Siallum nai 10 in kikap pheang hi. Kumpite laibu vawt The Chin Hills Vol. 1-na sung lai mai 30 sungah Siallum ngalkap tu aa, a pai, Sizang simtu lubeamte 60 le Lutung te 65, a vekpi-in 125, kikuan hi, tiin at hi.

Thuklai panin Sizang te omna Siallum simtu in, Buanmanah hong pai suk hi. Buanman pan Mualsan hong zui hi. Mualsan pan Ngumpi hong zui hi, Ngumpi pan Nalun, Nalun pan Taikhe, Taikhe pan, Taitan, Taitan pan Minsi, Minsi pan Siallum hong theng hi. Lampui pa Kiothuai in lam ap pui nik nek hi.

Siallum kulh hong thet dek tak tiangin, Kiothuai in, "U le nau, pu le pi te awng, kikap ngawl tu hi, Kilem tu hi, hong tum zaw ta vun," tiin hong au suk va pum hi. Tasia tiang, Pa Vummang le Ngang Thanghau a kulh pan a thau tawh pu suak a, Ngalkap mang khat ve ve kap lum pai hi.

Zing sang nai 10 pa kipan nai 4 dong Kumpite kido hi, Lubemte mah mah, Sizangte bang main hang ma ma a. Lubemte kilel bel hi. Lubemte hong pai bua hen a, Mangkangte le Lutung te bek hi le kizo tu a hi hi. Mibing 380 hong kuan sung pan kulh 2 hong zo zo ngawl a, kulh khat bek hong zo hi. Limkhai u le nau tein Siallum kikah laiin hong hun ngawl a inn ngal pan in hong en bek hi. Khiaphtham tuu le Thatkhuap tu tein hong hun ngawltu khu hi, hong kahpui ngawitu khu hi, hong ti bang main, Takkbawl—Duhmang khuaah a om hi.

Thuklai le Khuasak te a hi le ngal ki tai a hi manin hong hu nuam zong dui sungah ki-om tek a, hong bu thei ngawl hi. Tua lai takin Bo Orn Ngin pa te unau Khatkam, Kamsuak, Sonthuam Limkhai khuaah a teng hi.

Limkhai khua panin Khatkam, Kamsuak, Sonthuam hong kuan a, than lui hong zui a, ih u le ih uau mong siat takpi tu a hi tiang, ti-in a thin om thong thei ngawlin, Siallumah hong paitoin, a nai ta tak na panin Kumpite hong kap to hi.

Tua unau thum te ih hong kah tiangin, Mangkangte in Sizang a dangtein hu hi ta a, hong kim uum hi, tiin laiin, Siallum kap nawn ngawlin tawng nga hi. Tuak panin Mangkang te luang a thi le a liam teng puain Thuklai khuaah a tia to pui hi. A dang, mi vomte luang le kawlte luang a thite sia pua zo ngawl in, nusia pai hi. A zing tiangin mithi luang nawn to a, Thuklai mikang than le Thang than a phum hi.

Mangkangte a thi panin 3 thi hi. Mivomte le a dang Kawlte 83 thi hi, tiin kitiam teh hi. A hi zong The Chin Hills Vol. 1. page 31 naah Mangkangte Officer khat thi hi. Captain Mayne le Surgeon Le Quesne liam hi. Ngalkap 3 thi a, 8 liam hi, tiin at hi. Surgeon Le Quesne in Victoria Cross nga hi. Ngal baksa ma ma tiang, Victoria Cross king a thei pheang hi. Tua a hi tiang, Mangkangte zongin, Siallum ngal, Sizaugte do sia, baksa ma ma sa hi.

Ei mi a thi panin, 24 thi hi, tiin kitiam teb hi. A hi zong, The Chin Hills Vol. 1. page 30 na sungah Tuahnuam tuu 100 bang pha hi. A hi bang a kulh sungah 80 bang om hi. Tasung a mihing 29 kikap lum a, 11 liam hi, tiin at hi

A zing tiangin, Mangkang te pawl a thi teng luang kinawn a, a ni 5 ni tiangin hong kuan kik hi. Hong kuan niin, Ting (Top) hong keng a top tawh hong kap masa hi. Mihing te kitai siat zo hi napiin thautang le thau vui bo thawthong in, hi va nul in hong kap va nawm thaw thong hi.

Tuahnuam tuu thau tawi 30 kipha bek hi. A thi teng kim khat kiphum a, kim khat inn khat sungah kikhoh zi hi. A hong kuan kik ni-in Siallum inn khat sim ngawl, a vekpi-in hong hal thap sak siat hi.

Taapte pawlin, Kamsuakte unau ih Siallum ngal hong sim pui sia, lungdam na tawh ma ngil thei ngawl hi. Tasia abi bang ma Kamsuak kihuh a Pu Do Lian zongin a thi dongin hu hi, ti-in kitiam te hi.

Khiapthuam tuu le Thatkhup tuu te ih hong huh ngawl a hi bang, thin uk tuan na kinei ngawl hi. Hong thu hilna te, thu maan thu tak hi, tiin kiphawk kik hi.

Limkhai Manglun te ih Kumpite a tuu pai a, hong khiak zong, thin uk aa kinei ngawl hi. Ih pu ih pa, ngal hang lei law lawm a hi kom, a zawtu tawh, a zawh ngawltu tawh, zo tu aa, ki-um a, a thin letna lang sak a, tutiang dong, Sizang pa tang thin le lung mu pha nei te in nuam thong peang ngawlin Zapante a thi dongin, kap leleu hi.

Dui sungah a kitai na thu pan, ih hiam zak, ih na zak kibang ngawl a hi komin dui sungah kitai hi. Lupheangte hong kihel ngawl hi le a, Lutung te le Mangkangte bek hi le, Sizang ngam hong zo ngei ngawl tu hi, ti-in ih pu le pa ih te in son hi.

Tuahnuam tuu ni 4-5-1889 kum a thi:—

- (1). Liankham. (2). Vummang. (3). Sempau. (4). Tuangvungh. (5). Hangsing
- (6). Paulam. (7). Khuplam. (8). Kamtin. (9). Khupvum. (10). Zavum.

Myo-ok Suamna Thu

Kum 1892 October ni 9 ni-in Myo-ok kisuum hi.

Kum 1891 kum tiangin Kumpite sungah kitum thiangtho hi. Kumpi thu hong piakna panin, khamtung mi nam puite awng, ko bangma hong law nuam hi ngawl khu hi. A hi zong Kawlte na mat uh theampo a vekpi-in na tia sak kik siat tu uh hi, tiin thu hong pia hi.

Tu-in nguta a hi zong, mihing pha ngawl a hi zong, hong om tu hi. Nguta a om le hi bang vawt tu hi, ti-in na thu kimna hong vawt ta vun, hong son ta vun. Ko, Kumpite sang pan, nong thu son na te uh leh na vawtna uh te kong thu kimtu hi, tiin Kumpite in thu hong pia hi.

Mangpi, Vuandok, ngalkap mang, Myo-ok, kamphen, tate theampo ih hong ti tiangin zo ngeina a om bangin, hausa khat tiang, khi ba khat tek, nguta te kham na tu-in, mangpipa khut sungah kikawi hi.

- (1) Khuasak hausapa—Khuppau.
- (2) Thuklai hausapa—Kamlam.
- (3) Lunmun hausapa—Thukkham.
- (4) Buanman hausapa—Paukhai.